

摘藻堂四庫全書薈要

史部

欽定四庫全書薈要

史部

殊批諭旨卷二百十三之五

詳校官編修巨繆晉

欽定四庫全書會要卷八千一百九十八

史部

硃批諭旨卷二百十三之五

硃批邁柱奏摺

雍正十年正月十二日湖廣總督臣邁柱謹

奏為恭報楚省得雪情形仰慰

聖懷事竊照楚省地方先據州縣呈報於十二月初八日及十六十七連日得雪臣自襄陽回省於正月初二初三日舟次又連朝遇雪深有尺餘隨即晴

和所有冬臘得雪情形相應繕摺奏

聞恭慰

聖懷謹

奏

覽得雪優渥情形深為楚民慶慰

同日又

奏竊照鎮守總兵官周一德赴京員缺先奉

諭旨於通省總兵內揀選調補或於副將叅將內揀選

委署

命臣一面奏聞一面即令赴任臣即會同提臣岳超龍
選得永順協副將楊凱委署鎮印業經

題奉

俞旨欽遵在案今查楊凱署印以來於地方營伍諸事
留心整飭且久任紅苗地方實屬人地相宜況周
一德業已留京另用則鎮守總兵一缺現在應補
仰懇

皇上准將楊凱

恩賜補授俾其專心辦理以裨苗疆至所遺永順副將
員缺有保靖營遊擊王進昌經臣請補荆州營叅
將現今赴部引

見該員久任苗疆熟知土俗情形而居官辦事甚為妥
協請即補授永順協副將其荆州營叅將一缺臣
查提標前營遊擊董朝輔歷練老成熟諳營伍以
之補授則人員各得其宜其董朝輔員缺以候補

遊擊黃天寅補授臣因要地需材伏請

皇上特頒諭旨或容臣具

題統祈

睿鑒批示謹

奏

所請俱是候另有諭旨

雍正十年二月二十四日湖廣總督臣邁柱謹

奏為恭報楚省雨雪情形米糧價值仰慰

聖懷事竊照湖北臘月喜得連次瑞雪業經臣具摺奏

聞今據湖南布政使張璨開報自雍正九年十月起至

本年正月各屬俱得雨雪充足現在上米倉斗每

石八錢四五分至九錢五六分不等中米每石七

錢二三分至八錢七八分不等又據湖北布政使

徐本開報通省自上年十月以來雨雪調勻上米

倉斗每石九錢至一兩以外不等中米每石八錢

四五分至九錢五分不等下米每石六錢三四分

至八錢不等各前來理合具摺奏

聞恭慰

睿懷謹

奏

覽楚省雨雪情形米糧價值朕懷曷勝欣慰

同日又

奏為奏明事竊照楚省北南雖獲連年豐稔米糧價
平但鄰省搬運甚多皆緣富商大戶牟利之徒任

意私販廣為囤積是以每年三四月間楚省因販

多而價長鄰省因囤積而更昂壟斷罔利民受其

困今查漢口地方自去年十一月至本年二月初

旬外販米船已有四百餘號而鹽商巨艘裝運者

尤不可以數計目下米價已漸增加倘至青黃不

接之時必甚昂貴楚價一長則鄰省之貴可以類

推臣以民食攸關亟宜豫計伏查雍正元年欽奉

上諭凡鄰封郡邑偶遇荒歉即相拯恤毋得各分疆界

漠不相關其所當禁者富戶規利販米動盈千萬該督撫提鎮當著實嚴查禁止欽遵在案是鹽船夾帶以及販戶囤積之米亟應暫停至於鄰省或有需米平糶臣一面移咨江省即速委員齎價來楚將南北倉貯常平襄漕等米可得一二十萬石運回平糶楚省秋收買補每穀一石不過三錢以外至四錢為準倘鄰省不用即在本省青黃不接時減糶於民有益如此則囤積病民之弊可杜而楚省

與鄰省之民均無食貴之虞是否有當伏乞

睿鑒謹

奏

如是辦理可謂酌劑合宜一舉而兩得也

同日又

奏竊臣前因鎮臣岳含竒極言楚省烏鎗精利經臣

將製就之鎗五百桿交付帶往後又照式再造五百桿并備九龍袋藥筩各五百副星夜告竣現在

委員給與路費於本月十六日起程解赴涼州軍
前應用理合奏

聞謹

奏

工欲善其事必先利其器此舉是嘉悅覽之

雍正十年三月二十一日湖廣總督臣邁柱湖廣

提督臣岳超龍謹

奏為請

旨事竊查楚省水師七營於雍正六年蒙

皇上命選閩省熟練兵丁五十名至楚教習續經臣岳

超龍請

旨又發五十名連前共一百名分發各營安插按給糧
餉勤加訓練迄今已經三載各營水兵凡往來進
退及行使撐駕之法據各將備俱稱傳授精熟又
經臣等各加試驗相符現據洞庭協詳據閩兵徐
申等呈稱申等奉撥至楚教習水務今已純熟得

法無可再加指撥之處乞發回閩仍歸原伍報效
等情前來臣等伏查楚省水師兵丁既已熟習從
此可以自相傳授所有原撥閩兵似可仍回閩省
各歸原伍仰請

皇上睿裁俟

命下之日於公項內酌給路費委員護送回閩合併陳
明謹

奏

該省水師既稱學習熟諳閩兵自應仍歸原伍照所請
發回可也

雍正十年四月二十六日湖廣總督臣邁柱謹

奏為請留任事能員以收勸墾實效事竊臣現准部
咨內開湖廣巡察歸宣光以鄖襄兩府開墾荒地
等因具奏奉

旨歸宣光所奏著交與該督撫揀選賢能官員勸導民
人實力開墾務使田疇日闢地無棄利以惠楚民欽

此臣即會同撫臣現在欽遵奉行外伏查鄆襄二郡距郡遙遠雖墾荒之責在於守令而朝夕提撕就近督察則鄆襄道一官尤為緊要該道趙之均先以荆關加耗經臣疏叅審明具

題現在候

旨或蒙

皇上思念功勳之後不加重譴而之均生於世祿之家未悉閭閻之事恐不能勝鄆襄重任亦應量材別

用臣再四思維有原任襄陽知府尹會一經臣遵
旨請補江南揚州府知府因留辦赴陝兵丁軍需現在
交代未赴新任該員任襄數載頗得民情且任內
以勸墾曾邀議叙以之補授鄖襄道缺洵屬相宜
臣因勸墾需員冒昧陳請可否伏候

聖裁如蒙

俞允其揚州府缺臣於楚省選擇未得勝任之人恭懇
皇上另賜簡補庶要地均有裨益矣謹

奏

揚州府任甚屬緊要命尹會一交代事畢速赴母遲

同日又

奏為請

旨事竊照湖南所屬武岡一州路達滇黔川廣地雜苗
徭素稱難治知州非強幹勤練之員未足勝任今
現任葉居仁因患病詳請回籍調理業經撫臣會
題在案所遺員缺臣查現任湖北嘉魚縣知縣王

邦鼎經臣歷試其才守俱優且稽查地方善於弭盜以之補授武岡州知州人地相稱其嘉魚縣亦係繁難之缺且境內隄堦甚屬緊要查有張其維係由舉人候選知縣奉

命發楚辦理水利事務委修蒲圻縣隄堦依限報竣又委試京山縣并安陸通判事務去冬部咨行臣辦鉛十萬斤解往甘肅臣委該員領解刻期無誤且十萬斤之外餘鉛千餘斤逐一交足脚費又復節

省允稱實心辦事之員以之補授嘉魚縣知縣必
能勝任相應請

旨或允臣具題或

特降諭旨統祈

皇上睿鑒施行謹

奏

候另有諭旨

同日又

奏為奏

聞事竊照前任湖北革職撫臣鄭任鑰奉

旨著出銀二三萬兩修理湖廣隄岸任鑰已於修隄案內先繳銀一萬三千四百餘兩尚有應補湖南公項九百九十九兩零亦經續繳完庫又任鑰應追擅動耗羨銀四千八百餘兩今俱節次通完訖所有鄭任鑰各項追完緣由相應奏

聞再查修隄案內雖部議楚省再有應修工程仍於鄭

任鑰名下追繳等語但查任鑰修隄及追補耗羨
合計已及二萬之數訪其居官尚無穢蹟今各項
措置通完似無餘力臣查雍正七年欽奉

俞旨凡官員居官聲名不好有負任使者間令於該地
方工程效力以示懲儆非其人犯罪甚重籍沒家貲
者比也督撫應審度伊等之力量分別辦理等因欽
遵在案今鄭任鑰可否准令回籍

恩出

聖裁伏乞

皇上批示遵行謹

奏

鄭任鑰准令回籍即一面咨明該部存案

雍正十年五月二十二日湖廣總督臣邁柱謹

奏為據實密摺奏

聞事竊臣荷蒙

聖恩畀以總督重任凜遵

訓諭自蒞任以來疊行各鎮協營整飭行伍餉無虛冒
諄切誠諭竝復委員查驗詎意提標五營猶有存
留空糧冒支冒銷情弊經臣先已訪聞一時未得
確實是以未敢奏

聞嗣因臣

奏請補授提標前營遊擊黃天寅赴任臣復諄諄面
諭密令將營中一切兵馬錢糧器械等項據實查
報去後今據遊擊黃天寅稟稱於三月初二日到

任守備呈繳隨丁糧餉除應領十五名外實多出
五名又紙劄餉一名其所多糧餉存留內署不敢
擅支細查五營莫不皆然合將職營空糧數目開
報提督馬糧一名戰糧三名紙劄戰糧二名遊擊
戰糧五名紙劄戰糧一名守備戰糧二名守糧一
名紙劄戰糧一名千把總各戰糧一名又貼中營
紙劄戰糧一名共計二十三名等情又據該遊擊
稟稱點驗本營兵丁除前報空糧二十三名之外

又有一十七名係有名無人糧餉當飭查考補旋據該備呈報自雍正七年春季起將營中退伍兵丁空糧或存留一月或存留數月甚或存留年餘久不開報名曰小費以供支用之項衆皆同然至於公費名糧一十二分既未辦理營務其作何開銷之處行查該備竟不回覆詢據經識稟稱此項公費銀兩俱係中營扣出留作提督取用仍委守備輪管支銷所以不敢稟請賬目以致無案可稽

等語再查雍正六年出師貴州有領買馱馬銀一

千二百兩除買馬八十匹用過銀六百六十七兩

零又於雍正八九兩年報倒未滿椿馬一十四匹

代兵賠過銀一百一十二兩下剩銀四百二十兩

零該備將此項銀兩借貸官兵止存銀一百一十

兩零所借銀兩至今尚未清還除將前項存留各

空糧回明提督現在陸續報補竝將公費修理甲

械其借出馱馬銀兩一一清還外合將查明緣由

據實稟覆等情到臣伏思提督一官統轄全省應
宜正己率屬廉潔自矢庶期無負

聖恩今提臣岳超龍如此虛兵冒餉有干

功令臣不敢壅於上

聞謹據實密摺請

旨可否容其募補實伍抑或即行疏叅伏候

皇上訓示遵行謹

奏

飭令岳超龍將空糧速行募補仍嚴加訓誡以杜將來
雍正十年七月初四日湖廣總督臣邁柱謹

奏為恭報早稻收成分數米糧價值仰慰

睿懷事竊照楚省早稻分數米糧價值經臣先行北南

布政司確查詳報去後今據湖北布政使徐本湖
南布政使張璨開報前來查湖北武昌漢陽黃州
安陸德安荊州襄陽鄖陽等府及歸州各所屬收
成自十分九分以至八分七分不等米價每石自

六錢三分起至七八九錢不等湖南長沙衡州永州寶慶岳州常德辰州永順等府并澧郴靖等州各所屬收成自十分九分以至八分七分不等米價每石上米自七錢一二分起至八錢不等中米自六錢一二分起至七錢不等所有各屬早稻收成細數臣謹另摺分晰恭呈

聖鑒外再查楚省北南地方晚禾亦甚暢茂濱江大隄俱各穩固惟於閏五月十一二等日襄水陡漲漢

川潛江天門沔陽江陵監利等州縣支河民隄間
有瀾漫衝潰之處然旋即水退已經如式搶築完
固其稍被水淹地方二麥已登早稻亦已收穫臣
仍查明實在窮民捐穀軫恤令其補種晚禾雜糧
秋收有望恐厪

聖懷合併奏

聞謹

奏

全楚早稻收成及米價平減情形以手加額覽之

同日又

奏為楚北丁銀掛欠無幾據實陳明仰祈

睿鑒事雍正十年六月二十二日臣接准大學士伯鄂

爾泰等奏摺內開湖北巡撫王士俊奏稱丁隨糧

派一案臣等原議將新報陞科之糧銀抵算竝非

以新陞之丁銀攤減王士俊錯會原議乃以陞科

丁銀與更名地畝丁銀攤減遂覺減免無期不知

以陞科糧銀與更明地畝丁銀抵算正自減免有
日就新報糧銀於鍾祥等增丁千兩以外之縣先
行裁減便覺輕省自永無苦樂不均之累應令仍
照_臣等原議行至更名地畝加丁銀兩應令密飭
鍾祥等縣少緩催比於奏銷時聲明將該縣考成
從寬酌議至按察使唐繼祖奏稱拏獲張東周復
有姦黨聚眾其鍾祥令王世經因循柔懦俟此案
結後另行查報嚴叅所見亦是俟該督撫叅奏到

日交部嚴加議處等因密議具奏奉

旨依議欽此鈔寄到臣伏查張東周等聚眾抗糧一案
已經具

題其王世經俟業結另叅并密札撫臣王世俊欽遵

外竊臣奉

命兼理錢糧事務敢不仰體

皇仁細察民隱臣查丁隨糧派原屬公平至當之法此

山東直隸等省皆然臣於江西亦然故臣於楚北

一省循例請行兩年以來無田者免累田多者樂輸行之頗有成效未聞有人含怨即鍾祥縣三十餘鄉亦各完納無異惟羅小利河兩鄉二三土棍張東周等藉均田之隙以減賦為詞鼓衆抗糧乃撫臣王士俊初到湖北未悉民情因二三土棍抗阻之案遂倡立己見謂丁銀不宜通省均攤請歸各州縣隨田完納等因具奏奉

硃批與督臣商酌題請欽此臣前已縷悉直陳業經閣

臣議覆未便因土棍抗糧頓為更改奉

旨依議欽遵在案今撫臣將閣臣原議新報陞科之糧銀抵算更名地畝丁銀之處不悉心詳繹乃以陞科丁銀與更名地畝丁銀攤減遂以減免無期錯會具奏復經閣臣奏明已在

皇上睿鑒之中臣不復贅陳惟是撫臣奏稱加派之丁銀掛欠累累加丁之州縣人人含怨而鍾祥一邑重累更甚等語夫花戶掛欠內多田糧非止掛欠

丁銀而撫臣獨指丁銀掛欠累累是未完銀兩不
分田糧丁銀俱作增丁未完之數甚屬含糊且江
夏等十九州縣自加丁以來嘉魚漢川等一十三
縣雍正七八九年地丁銀兩全數通完竝無掛欠
分釐其未完之沔陽鍾祥等六州縣向來俗敝民
頑掛欠錢糧非因加丁重累所致今撫臣不論民
之淳頑不察官之勤惰以均丁良法為強加以抗
糧聚眾為重累以通省民情樂輸為人人含怨臣

實不解再查通省更名田糧一十四萬六千餘兩
共派丁銀一萬八千餘兩現有雍正七八兩年新
報陞科糧銀七千七百六十餘兩遵照閣臣原議
於鍾祥等增銀千兩以外之縣先行裁減造冊送
部外至閣臣議令更名地畝加丁銀兩密飭鍾祥
等縣少緩催比之處臣查未完錢糧州縣惟沔陽
一州雍正七八九年錢糧雖共有未完銀三萬一
千一百餘兩未完錢糧民賦居多實緣該州地處

低窪從前收成歉薄民力維艱雍正八年內已蒙
皇上軫念民瘼將十年民欠
特旨蠲免其地方貧疲久在

聖鑒之中非更名地畝增有丁銀之所致也應請毋庸
飭令緩徵至鍾祥縣雍正八九兩年尚有未完銀
三千二百六十兩江陵縣未完銀九百一十餘兩
江夏縣未完銀一千一百餘兩漢陽縣未完銀七
百九十餘兩俱係零星尾欠約計每戶丁銀多則

錢許少則分釐不等竝無掛欠累累亦無庸飭緩
於雍正十年錢糧本年二麥早稻俱已豐收中晚
禾亦皆吐穗將近收穫民間輸納亦易為力更無
庸飭緩催比可否伏乞

皇上命閣臣議覆遵行臣本從甦累便民起見若果民
情稍有不便又何敢屢瀆

聖聰伏祈

睿鑒謹

奏

將閣臣議覆之摺一併發來矣汝其詳加體察酌量行之

雍正十年八月二十五日湖廣總督臣邁柱謹

奏為請

旨事竊惟我

皇上恩待臣下無遠弗屆滿漢文武視為一體重祿常俸之外文職賞給養廉銀兩武職賞給親丁糧餉

普被

皇上豢養深仁百爾臣工感激歡忭臣受

恩深重地方稍有見聞未敢緘默今查駐防荊州將軍

僅有親丁糧餉六名左右兩翼副都統各有二十

名多寡懸殊臣從前無由而知昨因將軍臣吳納

哈奉

命進京一時盤費無措艱於就道臣詢及養廉一項始

知將軍親丁食糧名數不及副都統三分之一臣

隨代為雇備騾頭資給路費吳納哈方得束裝起
程竊思將軍大吏統轄駐防八旗官兵閱操犒賞
一切應酬用度較多未免需用不敷臣仰體

皇上恩賜羣臣養廉俾令足用至意謹擬於存公銀內
每年酌給銀一千兩以補不敷之需可否出自

聖恩如蒙

俞允伏祈

皇上特頒

諭旨遵行謹

奏

所請可行祈朕特頒諭旨何其鄙小之至

同日又

奏為遵

旨查覆事雍正十年閏五月初六日准大學士鄂爾泰
張廷玉蔣廷錫字寄雍正十年五月十七日奉

上諭據黃廷桂所奏劉瑞柏丁容度出首伊主車鼎立

各件顯係劉瑞柏等背主潛逃捏詞誣陷並非車鼎
立有叛逆實據也至供詞內稱車鼎立私藏呂留良
家訓評語及車鼎豐等所做土因集等語查呂留良
家訓評語中並無悖逆之言外間刻本甚多至於土
因集乃本朝初年沈姓所作京中現有刻本亦非車
鼎豐等之筆也口稱舛錯如此則其假偽可知爾等
可將各件寄與邁柱閱看著邁柱留心訪察車鼎立
周郢生李端友等平日為人何如若果係生事狂逆

之人則當查其收藏書籍以懲不法若平日本無狂悖劣行則未可以其為車鼎豐之堂兄遂聽逃奴誣陷之詞刻意吹求使之罹於重譴累及身家也欽此

寄字并鈔錄四川督臣奏摺劉瑞柏等供摺并各件到臣密訪車鼎立痴愚羸弱不甚通文藝伊父車萬備曾任江南淮安府沐陽縣知縣七十歲生鼎立十一歲父歿遺有莊田資財交家人丁容度劉瑞柏二人之父掌管甚是忠誠迨其父歿即

丁容度劉瑞柏接管而鼎立惟此二人是任雖至親嫡族無款洽周卹之誼詎丁劉二僕不能克肖其父誑騙鼎立經營以及年收糧食大半飽諸私索任意花銷丁容度誘令鼎立埋銀於後園旋往偷挖入己挈眷二十四口同劉瑞柏之兄劉瑞章七口逃往四川鼎立平日不得於親族獨立無助無從查察追尋惟造明逃口冊呈縣存案因究及劉瑞柏歷年經手糧食盜賣亦多經營資本盡歸

烏有而瑞柏亦同其子逃避鼎立將瑞柏妻與媳
孫女四口呈縣拘回家中瑞柏即造一謗紙令人
投諸鼎立意欲挾制其主要出家口而去鼎立隨
將此謗紙呈府飭縣拏獲瑞柏父子枷責交主服
役而劉瑞柏又逃至四川同先逃之丁容度在川
首報委係背主潛逃捏詞誣陷已蒙

皇上日月之明洞察隱微又訪周郢生即生員周任生
在鄉安分讀書從無劣行行李端友原籍蘇州吳縣

隨父貿易湘潭縣貧不能歸遂家於此教書糊口

亦無劣跡至劉瑞柏等在川省供報車鼎立做未

燒集李端友做自欺集其中有無悖逆之詞周任

生果否受寄呂留良逆書臣無由而知因委荊州

道高起前往湖南會同衡永郴道許登瀛再加密

訪竝令轉諭地方官查取前項書集去後今據該

道等稟稱訪得車鼎立為人鄙吝乃一癆損病軀

周任生李端友皆守分書生諭令寶慶府出其不

意至鼎立家細查書籍獲有未燒集一本乃車鼎
立少年所作時文又有偶錄一本據鼎立供內有
鈔錄李端友所作自欺集內詩文數十篇詢問所
寄藏呂書據供呂留良家訓與評語原有此書雖
無悖逆之語聞此書亦不可留久經燒燬無存土
因集竝未見過此外竝無他書寄藏據供被丁容
度劉瑞柏二僕拐逃之事府縣俱有審案與臣所
訪無異又令邵陽縣到周任生家細查竝無藏匿

呂書訊之周任生與車鼎立供同該道等又到湘

潭委員至李端友家查獲自欺集一本欺人集一

本皆端友平日所作詩文竝無悖逆之語隨令長

沙府取具端友親供在案臣查車鼎立等既無生

事悖逆劣行亦無寄藏呂留良之書經府縣各官

竝族鄰地保出具印甘各結存案外所有背主拐

逃捏詞誣陷之惡僕劉瑞柏等應行令四川督臣

查明男婦口數遞解湖南撫臣按律究擬以昭法

紀統祈

皇上睿鑒訓示欽遵施行再車鼎立等所作詩文并各
字札口供另送閣臣查核訖合併陳明謹

奏

照所奏結案可也

同日又

奏為奏明事竊照上年挑選楚兵二千名前往涼州

駐劄經臣恭疏

題報在案本年五月內楚兵移駐巴爾庫爾軍營各
兵丁家口在楚聞信僉謂從前帶去勒鞋已歷半
載今又出口不無穿破非比別項軍裝可以就地
製辦各丁家口做備合脚綿勒鞋三雙由各營將
備彙解到省臣因勒鞋一項於衝鋒禦敵之際兵
丁藉以便利勇往且口外尤當多備臣隨動用口
岸節省銀兩雇備騾隻馱載委員解赴軍前分給
各兵以資征防理合繕摺

奏明伏祈

睿鑒謹

奏

向後有類斯資助兵丁之舉當預為奏請得旨後再行
此番辦理雖屬可嘉但出塞兵丁不止湖廣一營楚兵
數僅二千自易於製辨別省士卒同在行間倘心生欣
羨亦欲效尤所關甚鉅是可謂行小惠而未計及大要
也

雍正十年十一月初九日湖廣總督臣邁柱謹

奏為奏

聞事竊照湖北學臣凌如煥為人誠實矢志清廉自到任考試以來關防慎密從公取士廉明公正之頌不絕棚場道路之口今三年期滿復

命在邇雖學政清廉分所當然但士子咸深愛戴與臣訪聞無異臣未敢緘默相應繕摺奏

聞伏祈

皇上睿鑒謹

奏

有旨將凌如煥再留三年矣其人甚聰明曩日行止頗
欠端方若肯洗心向上原係可用之才據奏果如此勉
勵朕深幸得人

同日又

奏為奏請揀發武員事竊照上年五月內蒙

皇上敕發張照管之經薛璠王清黃天寅徐有文等交

臣以遊擊用欽此臣於各員到楚後酌其人地相宜者已經陸續

題補現無候試之員將來遊擊缺出乏人委用仰懇皇上於候補遊擊內揀發五員交臣委試以資臂指之用於地方營伍實有裨益伏祈

睿鑒謹

奏

兵部議奏

同日又

奏為請留因公墜誤之能員以備任使事竊照原任
孝感縣知縣張鍾秀因少差解役疎脫行劫江西
官署盜犯沈二楊金山一案經臣

題叅部議降一級調用仍留地方協緝後因一年限
滿只獲楊金山一犯復經部議照例降二級調用
今沈二一犯亦已拏獲俱經解赴江西收審其限
年緝拏之案現准部咨註銷在案則該員例應赴

部另補臣查張鍾秀在任二年有餘聽斷明敏催科不擾而且民情風土尤所熟悉似此能員因公降調殊為可惜仰懇

聖主格外洪恩准將張鍾秀交臣仍以知縣委用三年無過准其實授則較之初任學習者固屬諳練而該員得以照舊供職自當益圖報效矣臣仰體聖心愛惜人才起見冒昧陳請伏乞

皇上批示遵行謹

奏

照所請行該部知道

雍正十年十二月十七日湖廣總督臣邁柱謹

奏為奏明暫停捐納事例以平米價以濟民食事竊
照北南兩湖連年豐熟本年收穫之時米價甚平
每石七錢上下目今日漸增加每石一兩內外若
至明年青黃不接之前必甚昂貴楚價漸長則鄰
省益貴臣因民食攸關留心體察緣川米禁販不

得到楚江浙等省搬運甚多又兼本省收捐以本色穀石上倉是以楚省北南米價日增近聞江浙米價較之楚省現貴三分之一臣仰體

皇上一視同仁之至意不敢因楚米長價輒行禁遏竊思楚省收捐貢監穀石雖為積儲充裕兼可為江浙等省緩急撥用之需但現今數省米貴若楚省仍收捐納穀石未免穀愈少而價愈增臣再四豫籌欲為緩急通變惟有將楚省北南收捐事例暫

行停止俟癸丑年秋收豐稔穀價平減之時再行
收捐庶米穀流通楚民與鄰省之民均免食貴之
虞除一面出示通飭停捐外相應具摺

奏明伏祈

皇上睿鑒謹

奏

此奏是該部知道

同日又

奏竊臣前奏收繳六里烏鎗器械一摺經閣臣密議
應行給價繳銷奉

旨俞允欽遵辦理今據湖南布政司議詳六里地方給
銀三千六百兩又鎮算毗連六里其草屬紅苗烏
鎗應一併收繳亦給銀三千兩俱於公項內動支
委員逐漸收繳現今土苗嚮化陸續自行投繳惟
是土苗所用烏鎗多有火門在左及斤兩過輕不
足充營兵之用者十有八九若照營製改造合式

與廢鐵無異然因營兵無用而槩照廢鐵給價則
土苗所得無幾恐有格沮不得不酌估原製價值
分別輕重好歹寬給價銀以鼓舞之今議木拖機
弓各色完整不分火門左右合式與否八斤以上
者給價八錢其斤兩輕者每斤遞減一錢若鎗雖
損舊可以修整者槩照斤兩給以半價至於鏽壞
不能修整者照廢鐵每斤給價二分如此則土苗
愈加踴躍爭先繳銷矣再湖南苗地現今勸墾動

用公項資給牛種臣愚以為苗鎗收繳完日揀選
堪充營用者造冊達部酌撥兵丁演用其餘鏽壞
不合式者請改造鋤犁農具賞給力田土苗俾得
耕作之實用

皇恩普被有加無已是又勸墾之一助也至於土苗所
用環刀標鎗亦不宜比戶藏蓄俟烏鎗繳完行令
逐漸給價收繳為此繕摺具

奏是否有當伏乞

皇上訓示遵行謹

奏

所奏皆是可謂深得賣刀買犢之意也至於環刀標鎗之類亦自應收繳但惟順其所願而為不宜強迫

雍正十一年二月二十一日湖廣總督臣邁柱謹

奏為恭報雨雪情形仰慰

聖懷事竊照楚省上年十一月內連得瑞雪今於本年正月初三初四十三等日又得雨雪四郊霑

足據北南各屬稟報無異臣於正月二十五日自
武昌起程由水路抵襄所過地方麥苗秀發大麥
吐穗軍民寧帖目下米糧價值每石一兩以下較
去冬漸減似此太和翔洽惟有勸諭四民克勤克
儉而已理合奏

聞伏乞

皇上睿鑒謹

奏

以手加額覽焉

雍正十一年四月十一日湖廣總督臣邁柱謹

奏竊照楚省運陝米石其頭運米船一千五百隻開
運前後恰值時雨廣沛河流漸長舟行順利已於
三月十五日直達龍駒寨交米回空於二十二日
轉到小江口其二運米石又於三月二十五日陸
續起行仍遇雨水充盈正在源源輓運今於四月
初六日接准署陝西撫臣史貽直咨稱楚糧運送

兩回即有四萬五千石儘可接濟已將楚米暫請
停運緣由繕摺具

奏等因到臣茲二運米石將次發完餘米應停起運

臣擬於四月十三日起程回省其已碾停運之米

或糶濟民食或分貯各倉俟臣到省同撫臣德齡

商酌妥當另

奏外謹將准咨停運併臣起程回省日期具摺

奏明伏祈

皇上睿鑒謹

奏

因史貽直之奏隨經有旨命將楚糧停運也

雍正十一年五月初六日湖廣總督臣邁柱謹

奏為恭報二麥豐收分數米糧價值仰慰

睿懷事竊照楚省今年雨水調勻二麥菜豆俱獲豐收

茲行據湖北布政使鍾保呈報武漢等府州屬二
麥收成自十分九分以及八分七分六分不等米

價每石自七錢五分起至一兩不等湖南布政使
張璨呈報長衡等府州屬二麥收成自九分八分
以及七分六分五分不等米價每石自八錢二三
分起至一兩不等現在禾苗業已栽插經臣俱覆
查無異所有北南兩省二麥收成細數竝米糧價
值臣謹另繕清摺恭呈

御覽外再照漢口地方自蒙

聖諭敕令川省速弛米禁以來川米連檣而至米價平

減江浙客商搬運甚多目下二麥又獲豐收閭閻
俱有含哺鼓腹之樂且雨暘時若禾苗青秀此皆
我

皇上念切民依感召

天庥之所致也理合一併具

奏伏祈

睿鑒謹

奏

覽楚省二麥豐收情形曷勝欣慰凡此皆卿忠誠任事之效向來楚地不多種麥朕即位後屢命督撫訓導百姓樹藝未知目今十分中有幾分遵行者隨便具奏以聞

同日又

奏為請

旨事竊臣於上年八月邸報中伏讀

上諭聞北路所派四省綠旗官兵數年以來有陸續在

軍前病故者今年七月間該管將弁始接到部文而各家口從前所領月餉例應病故之日追出歸入截曠項內朕思國家養育兵丁加恩優渥而出征身故之兵丁尤朕所格外矜憫者其未奉文之前家口所領月餉此時安有力量可以措辦交官此項月餉悉著加恩免其追還等因仰見

皇上加恩於出征病故之兵丁至優至渥臣查楚兵赴陝出口以來亦有軍前病故者原營奉文開除已

隔數月行追家口長支糧餉并追故丁名下豫借
庫銀該家口俱以貧苦無依哀籲免追誠如

諭旨其未奉文之前家口所領月餉無力措辦交官事
同一轍但北路四省兵丁遇有軍前病故免追家
口長支糧餉出自

特恩未見部文通行臣下亦未敢援引然同一出征身
亡之兵丁自當共霑

皇恩一例邀免今楚兵遇有軍營病故者議動司庫三

分耗羨銀兩找給新兵家口并補還故丁之豫借
庫銀咨明戶部允行在案臣轉思楚省如此辦理
已經推廣

聖恩而別省尚有出征兵丁不知作何辦理仰懇

聖主洪慈再頒

諭旨宣示各省遇有出征兵丁在軍前病故者照北路
四省及楚省現行之例將家口長支月餉并故丁
豫借庫銀一槩免追准動該省存公銀兩支給還

項則

皇恩浩蕩無處不周矣伏祈

皇上睿鑒施行謹

奏

此奏是另旨諭部通行

同日又

奏竊臣據鎮守鎮總兵官楊凱鈔錄條陳巡察入境
應先於驛道衙門將各州縣驛遞額設馬匹數目

及買補年月毛齒彙取總冊到驛查點比對是否相符至於未設巡察省分其該管上司亦即照此查察以杜有驛州縣并驛丞等官向所屬紳衿同城營并借馬烙印驗過仍還之弊等因欽奉

皇上硃批與督臣商酌欽此臣查驛遞馬匹十分之內每年准銷倒馬三分或四分各省不一司驛各官將倒馬竝買補毛齒四季造冊彙報驛道前後更換不同該驛道衙門無有一定毛齒總冊若將新

舊所報毛齒彙造及巡察到驛近則隔月遠則逾季各驛遞又有倒斃新買多與道冊總冊不符是總冊之不足憑也伏查各省驛遞自我

皇上御極以來屢頒

諭旨加意整飭弊絕風清如有

欽差巡察者該巡察遍歷各驛查驗其未設巡察省分定例該管驛道每年查點一次又令知府直隸知州於每年奏銷并盤查倉庫之時一併親為點驗

倘有缺額疲瘦即行揭報題叅立法盡善司驛各
官鮮有朦混掩飾之弊該鎮奏稱州縣竝驛丞向
所屬紳衿同城管弁借馬烙印驗過仍還之語乃
從前陋弊近年責令大員不時稽查此弊久除該
鎮所奏均無庸議相應具摺

奏明伏祈

睿鑒謹

奏

所奏是

湖廣總督

臣

邁柱湖北巡撫

臣

德齡謹

奏為奏明事竊照撥運楚米十萬石赴陝備貯一案

業經陝省署撫臣史貽直覆

奏運送兩回即有四萬五千石之數儘可接濟餘米
奉

旨停運在案

臣

等查楚省地方潮濕若將停運米石貯

倉過夏勢必變色值此青黃不接之時亟宜平價

出糶以濟兵民更於米石可無虧損今查停運米
共五萬五千石除武昌府未報起程米二千石又
荊州府抵換解蘇平糶米四千七百石以及公安
松滋宜都三縣未到襄米共二千石俱經飭令停
運外其各屬碾米及所撥各倉襄漕米石已運到
襄及灣泊小江口共米四萬六千三百石應令武
漢等八府酌量分領轉發各屬糶賣如附近各營
以及防汛兵丁有願食此米者照雍正九年停運

陝米之例每石作價七錢於餉銀扣算給發其糶
濟民食者令各該府轉飭所屬各照時值平價出
糶所糶價銀各貯府庫統俟秋收豐熟發價採買
按照各屬原經派發碾米及原撥襄漕米數補還
實貯至原製口袋二十萬條除用去九萬條尚餘
一十一萬條以後運米須另製夾袋此係單布口
袋留之無用亦令各府分領變價解還補項其已
用口袋價銀竝運米水脚等費俟事竣之日查核

報銷再照已經運陝米石雖經

廷議有或應截漕還項之語但北運上關

天庾未便議請截漕應俟秋成動帑買補以足原額業
經咨部在案至陝省奏稱俟七月以後視秋收之
豐歉再定續運之楚糧臣等查丹江水勢惟霜降
之後舟行無阻如陝省酌議續運楚省於臨時或
碾米或採買再為運送亦易為力相應一併繕摺

奏明伏祈

皇上睿鑒施行謹

奏

將停運之米如是料理甚善知道了

雍正十一年五月二十二日湖廣總督臣邁柱謹

奏為姦邪不法之土司實難姑容仰祈

睿鑒事竊照容美土司田旻如素性獷悍制度僭越種

種惡蹟經臣節次

奏明按其狂悖行事實干不赦之條蒙

皇上念其先世微勞不即誅戮亦不罷斥天地之包容
無以逾此詎田旻如身受

皇恩不知感激口稱改悔仍然奸惡其所恃者以衆土
司作羽翼衆土司以田旻如為領袖從前土司之
構怨興兵皆聽命於容美現今土漢之犯法姦民
多潛藏於容美是以各土司積案纍纍終難完結
田旻如實為土司之罪魁土司之大害此官一日
不除衆土民一日不得安枕如東鄉司土官覃楚

昭施南司土官覃禹鼎皆田旻如之婿而兼甥舅也楚昭禹鼎恃有容美衛護淫惡殘暴更甚於別土司田旻如不能告誡反為袒護助惡東鄉施南之土民如在水火從前臣曾將覃楚昭以貪殘不法法參

奏經前撫

臣

王士俊審實擬斬監候已准部覆奉

旨依議今

臣

准部咨據田旻如奏稱覃楚昭黃口孺子

狃於習俗為伊婿妄行瀆奏冀邀寬典甚屬乖謬

至於覃禹鼎因姦旗長覃祈之媳張氏將覃祈暗害竝將見證張知義勒死滅口經覃祈之子覃懋濬等告發不但覃禹鼎不許州縣差役拘審田旻如即差人至施南講和人命一面幫搶原告藏匿又覃禹鼎向田旻如商謀在於施南銅鼓山私開路逕直抵容美便於狼狽作姦計開路一百七十里田旻如每日派夫做工覃禹鼎每日派民運米土衆紛紛逃奔又覃禹鼎私藏職位田旻如運送

硝磺現今查出礮位收貯縣庫施南土衆見覃禹
鼎殘暴不仁與覃楚昭無二呈請改土歸流經文
武各員詳報到臣除批布按二司一併查明俟詳
覆至日密疏

題叅外伏查湖北十九土司內忠建東鄉二司已經
題請改土歸流現今十七土司所轄土民惟容美約
有三千戶其餘土司戶口無多與貴州四川之土
司迥別田畝如猶如釜底遊魚況伊所轄土民被

其凌虐怨望日深若將容美改土歸流不必重煩
兵力臣思各土司所屬之夷民皆

皇上之赤子土官若能撫恤土衆即同內地之流官可
以不必紛更無奈田旻如陽為遵奉陰謀詭譎怙
終不改各土司聽其愚弄擅作威福荼毒生靈誠
如田旻如所奏狃於習俗也此等土弁實非寬貸
所能望其感化臣愚以為楚北各土司似應盡行
改土歸流將裁革土弁分發各省以千把武職酌

量補用則土官土民各得其所均沐

皇恩生成於無既矣如果臣言有當查田旻如妄奏請寬伊婿覃楚昭之罪現交兵部嚴加議處伏乞

皇上敕部調田旻如引

見令其在京酌給職銜臣即另具明本議裁各土司員

缺以各省千把總另補一面委員安撫土衆設立流官次第舉行易於辦理或容臣將田旻如劣蹟

臚列密疏

題叅一面摘印候

旨發審統祈

皇上訓示遵行謹

奏

另有諭旨命大學士轉發

同日又

奏為遵

旨回奏事雍正十一年正月初七日准大學士鄂爾泰

張廷玉寄信雍正十年十二月二十三日奉

上諭安陸府知府偉璉乃從河南揀選調往湖廣者近聞其操守平常爾等可密寄信與邁柱令其留心訪察奏聞大凡滿洲人員不患無才而難於有守目今在外為道府者不過數人若有一二人操守不固實為滿洲人榮辱進退所關不可不嚴加砥礪使之有成此則督撫之責也欽此等因寄信到臣臣查安陸府知府偉璉素性倨傲為人梗直辦事頗有才情

居官實無劣蹟即如前署漢陽府事詳揭漢陽縣
革職知縣黎昂徇私賣法一案經臣

題叅飭審緣叅本內有該縣鄉紳徐諤令伊子徐方
宏向黎昂投拜門生一款審出未拜門生之先黎
昂曾借徐諤銀五百兩未還比偉璉以紳衿不合
結交地方官但借銀一事原在叅案外令徐諤出
銀一千兩修城許將此款詳請外結徐諤依允先
措銀六百兩繳貯漢陽縣庫旋因新知府到任尚

未結案知縣許國鴻不敢自擔將銀退還徐諤收訖此事偉璉本無曖昧恰蹈瓜李之嫌前撫批黎昂呈詞即有聞徐諤持銀打點府縣兩衙門無不走到之語是前撫已疑偉璉得贓以致黎昂一案拖累兩年翻駁不結偉璉操守平常之聲名從此而起今年二月二十七日撫臣德齡親審此案惟注意於前撫所批徐諤持銀打點一節因先將徐方宏夾訊隨即押發臬司收監二十八九兩日臬

司又加刑審徐方宏只得招認送過偉璉銀二百四十兩盃緞表禮八色黎昂亦供曾見徐諤家人在偉璉宅門交銀等語臣查先叅黎昂諱強為竊一案係偉璉審明黎昂諱飾實情續叅黎昂徇私賣法一案又係偉璉訪明徐方宏投拜門生現審官犯有不怨恨偉璉者乎即至愚極貪之員亦無揭報他人行求賣法之後復索被揭本犯財物之理況黎昂係貴州舉人與前撫同鄉若知偉璉受

賄早已首報以洩被揭之憤何待今日扶同徐諤
父子含糊袒證耶若徐諤父子主意誣賴偉璉問
官當為秉公駁詰使反噬刁風不致縱長今因前
撫有風聞持銀打點之批撫臣信以為實故於兩
年之後刑逼徐方宏供報偉璉得贓實於情理不
合然終屬雙口且係一面之詞不足憑信又有安
陸府京山縣把持侵稅之劣監夏可俊上年十月
內赴巡撫衙門告偉璉滅案毀碑苛徵稅銀前撫

不查檔案輒批藩司行查今特委德安府知府親
往安陸密弔偉璉收稅紅簿拘訊經承牙行未免
小事大做知府竟為地棍所制撫臣又疑偉璉雍
正九年署漢陽府任內房船稅銀有徵多報少之
弊諭令兩司暨武漢黃道立提九年分經承查訊
殊不知漢陽府徵解稅銀惟九年分獨多若謂偉
璉多徵少解臣可信其必無或管事家人通同經
承瞞官作弊在所不免臣亦尚在查察臣欽遵

諭旨細加密訪查偉瓌初涖德安委署漢陽調任安陸

三任之中竝無枉法貪贓之事現今雖有浮議或
係出於讐口或被地棍誣告均非偉瓌得贓罪案
此外委無劣蹟近日亦知戒酒總因偉瓌為人倔
強心直口快梗議地方事務久為人所憎厭今撫
臣初莅尚未熟諳所用内幕又係前撫舊人凡前
撫好惡之員内幕無不留心現今物議紛紛撫臣
亦未覺察臣秉性愚戇今年六十有四惟有恪遵

聖訓所轄屬員滿漢一體從無偏向鉅細事務若不訪
察確實亦未敢冒昧具奏此臣之一念愚誠也除
不時教訓偉瓌砥礪庶隅務期成一好官外所有
偉瓌本無貪婪劣蹟之處據實回

奏伏祈

皇上睿鑒施行謹

奏

候另有諭旨由內閣頒發

雍正十一年七月初九日湖廣總督臣邁柱謹

奏為恭報早稻收成分數米糧價值仰慰

聖懷事竊照湖廣早禾今已收穫經臣行據北南兩布

政司各查明分數竝米糧時價分晰開報前來湖

北八府一州所屬早稻收成自十分九分以及八

分七分六分不等米價每石自七錢六七分起至

一兩一錢不等湖南八府四州所屬早稻收成自

十分九分以及八分七分不等米價每石自七錢

一二分起至八錢七八分不等惟是楚省素稱澤國每常夏潦本年五月間陰雨連綿六月初旬川水驟發又值襄水泛溢二水交激以致江陵監利沔陽荊州衛等處低窪田禾間有被水淹沒而江陵適當二水滙集之衝該縣熊良工隄塍被水衝潰所有早禾淹浸稍甚然通算收成亦有六分例不成災又湖南巴陵臨湘華容三縣沿湖最低之水田間有被淹之處旋即水退正可栽插晚禾

臣

現在酌動公項銀兩商之北南撫臣按照被水輕重之地方查明極貧次貧之佃民酌行周恤務使得所目下水已漸退潰口之處搶築保護仍可補種晚稻雜糧以望秋成總之北南連年豐稔今歲二麥早稻俱獲豐收現今中禾穎實晚禾青秀民間米價甚平倉箱稱慶理合繕摺奏

聞恭慰

睿懷所有早稻收成細數并米糧價值臣謹另摺分晰

開呈

御覽謹

奏

覽全楚早稻收成分數朕懷深慰其被水地方貧民加
意撫恤務令不致失所

同日又

奏為奏明事雍正十一年五月初九日准署陝西撫
臣史貽直協辦巡撫印務鄂昌咨開湖廣出征兵

丁應製軍裝陝省現經代辦其所動銀兩咨楚解還至所需藤牌五百面陝省無從辦解希速製備解陝轉解軍營等因臣查楚省雖有匠作能造藤牌然不及粵東之精工堅實若俟往粵製備未免往返遲延臣有捐製藤牌係委員赴粵造運來楚現發各該營演用今調回五百面驗看俱屬堅固鮮明已於六月十三日委把總王國泰領解陝西巡撫衙門交收約七月中准可到陝轉解軍營尚

未嚴寒得以早備征防又委千總王忠齋價前往
粵東製辦籐牌五百面俟回楚補還各營一轉移
間均得備用無誤事關備解軍需相應繕摺

奏明伏祈

睿鑒謹

奏

如此應辦迅速甚好

雍正十一年八月二十九日湖廣總督臣邁柱謹

奏為遵

旨回奏事竊臣前奏二麥豐收一摺奉有

硃批遵即諭令北南布政司所屬各地方十分中有幾
分種麥者細查去後茲據該司等開報前來伏查
北南兩湖向惟鄖襄兩府種麥其餘各府州屬種
麥者甚少自

聖明御宇首重民食屢頒

訓旨令督撫諸臣督率有司勸農布種因而民間漸次

種麥豐收獲利雍正四年以前楚省種麥者尚少
自五年水潦之後臣甫經到楚諭令地方官勸民
竭力種麥次年收穫已畢伏水方至閭閻大得麥
息之濟從此種麥者甚多至於湖北種麥分數又
倍於湖南臣察其情由緣楚北湖地較多於湖南
近年湖北百姓咸知麥熟在伏汛之前即遇大水
二麥先已登場足食無憂遂將素未種麥之湖地
遍處種麥是以北南種麥分數多寡不等然向之

廢棄湖地今如膏腴之產同收地利總由

聖心恰合

天心故於默默之中

上天佑民廣種地無曠土民多益藏莫非

聖教覃敷之所致也所有北南各屬地方種麥分數臣

謹另摺臚列恭呈

御覽伏祈

睿鑒謹

奏

野稀曠土庶幾民食無虞種麥分數欣悅覽焉

雍正十一年九月十六日湖廣總督臣邁柱謹

奏為恭報楚省中晚二禾收成分數米糧價值仰慰
聖懷事竊照楚省早禾收成分數臣已查明具

奏今中晚二禾又俱豐熟收穫經臣行據北南布政

司各查明收成分數并米糧時價開報前來臣謹

另具清單分晰臚列恭呈

御覽外查兩湖地方自七月以來雨水調勻中晚二禾
以及一應雜糧俱獲豐收即前比伏汛水漲湖北
被水之江陵等州縣湖南被水之巴陵等處已經
資助補種蕎麥雜糧現今茂盛是以前南米價甚
平地方寧謐理合一併奏

聞上慰

聖懷謹

奏

覽中晚二禾收數及米糧價值情形深為楚民額慶

同日又

奏為奏明事竊照湖北按察使王柔前在辰沅道任內辦理苗疆事務尚能勝任自陞臬司以來情性乖張好尚新奇治獄之道本不諳練各屬解審案件濫用刑威或苛駁原問官覆訊或另發別衙門承審任意妄行不遵成例以致屬員枉受遲延叅罰人犯解差又苦於往返拖累其到任之初已經

辨錯事件尚不認過反自回護前非如刑逼徐方
宏妄供安陸府知府偉瑛得贓一事今奉

旨查審臣仍令王柔會同各司道確審無非仰體

皇上大公無私之至意旋據王柔詳稱本司前審之時
徐方宏初供送偉守表禮八色銀四十兩因其供
情閃爍故令取刑嚇問方宏又供叫家人方起孥
二百四十兩銀子同黎縣主交與偉守家人劉姓
又送八色表禮今徐方宏與伊父徐諤堅供竝未

送有銀物前後供詞舛混方起遠颺未經出質難成信案是以藩司會稿本司未敢書行等語又據鍾保詳稱此案經本司會同臬司竝在城各道當堂公審而徐諤父子堅供畏刑妄供即質之黎昂亦稱實未見有饋送銀物之事今徐諤父子既不承認則伊家人方起即不到案質對亦無足重輕倘有情節未明當會審之際臬司何不當堂駁詰而乃於取供審定之後發武昌漢陽兩府成招復

以供詞舛混未敢書行本司亦難勉強除將本案會同各道繕詳另報外將臬司未經會稿緣由詳明等因前來除藩司各道會詳本案臣與撫臣覆核無異另摺回

奏外伏查王柔既同各司道會審徐方宏等堅稱畏刑妄供實無饋送銀物之事偉瑛未有贓私實蹟乃公會審之後經藩司會稿而王柔獨不書行以前後供詞舛混另詳推其意必須復夾徐方宏

令其供認饋送銀物以符自己前審之供是一味
偏執濫刑不顧屈抑屬員當此光天化日之下難
逃

聖明洞察謹將王柔冒昧之處及審明偉璉無貪婪劣
蹟又不曾詳緣由據實

奏明伏祈

睿鑒謹

奏

王柔原取其有勇敢任事之長耳至於識見才調俱屬平常而且性情粗急前在道任時朕於汝等奏摺內已曾批諭矣

雍正十一年十一月初九日湖廣總督臣邁柱謹奏為請

旨事竊照永州鎮總兵印務前奉

上諭著臣於屬員內揀選遞行委署經臣選得長沙協副將王惟一老成幹練久歷苗疆將該員

題請署理之後臣以永州一鎮壤接粵西苗徭雜處
最為緊要仍時常體察看其能否勝任今查王惟
一在副將任內克盡職守自署理總兵印務以來
優柔供職一切辦事識見均不勝任臣不敢因已
經題署之員姑為因循查衡州協副將崔起潛才
技優長操守謹飭實心任事堪寄重任請將崔起
潛署理永州鎮總兵印務可期裨益其所遺衡州
協副將員缺即以王惟一補授亦屬輕車熟路一

改署間則封疆大吏得人而人材亦各器使咸宜矣如蒙

俞允伏請

皇上特頒

諭旨施行謹

奏

朕將王惟一原記名劣等前於題署永鎮時以為知必就近體驗的確另有鑒別是以勉從所請不謂仍復如

故據奏已有旨諭部矣崔起潛朕雖不深知然亦屬中材不便特旨命攝此缺今仍著卿題署候部文到日或委令崔起潛暫署數時一面另檢別員更替卿其酌量為之至於王惟一如此景况朕恐副將一任亦未必克勝其留意斟酌摺奏以聞

同日又

奏為奏

聞事竊臣密叅容美司田旻如不法一案准兵部咨奉

旨著暫停革職審擬伊曾屢請陞見今著來京候朕詢
問再降諭旨欽此行令將田旻如委員伴送進京赴
部引

見等因隨經臣繕給部咨委彝陵鎮中營守備韓岳前
往該土司伴送田旻如進京去後詎旻如假捏有
水衝田產之土民正在撫恤遷移不便起程鈔錄
該土司摺稿將已經奏請寬限兩月緣由稟覆到
臣伏思田旻如素性狡獪向來令人在各衙門探

聽事情緣

臣

防範慎密叅伊款蹟無從鈔看故假

撫恤土人之美名奏請寬限希圖廣探叅款內情

節預備

廷詢展辯之計亦未可定似此狡詐行為難逃

皇上睿照之中然田旻如既經冒奏請寬限兩月惟有
靜候

諭旨遵行經臣咨明內部在案今據彝陵鎮總兵治大

雄稟報十月十五十七等日有容美土民攜眷裹

糧到巴東縣地方共有五百餘人口稱土官奉調
進京抗不起程恐其在司妄為累及土民是以出
司躲避等語臣念土民向被土官凌虐歸流心切
今出來人衆似難強其復入隨諭附近州縣官王
志遴等暫為安插查明內有乏食者捐給口糧俟
田旻如進京候

皇上詢明奉

旨到日再為妥協辦理并令彝陵鎮後營遊擊張廷蘭

遊巡彈壓外所有容美土民出司緣由理合繕摺
奏

聞伏祈

睿鑒謹

奏

觀卿辦理容美事務似覺過於輕視百凡有備無患稍
涉輕忽則恐有疎畧之失前次諭旨甚明其遵諭慎密
圖維靜以俟之可也

同日又

奏為奏明事竊照楚省收捐貢監事例臣因上年江浙米貴搬運甚多楚省北南又以本色穀石收捐米價日增是以具摺

奏請暫停收捐以濟江浙民食俟雍正十一年秋收價平之時再行開捐准部覆奉

旨依議欽遵在案今當秋收豐熟之後楚省停捐事例應請照舊開捐但聞今年浙江米價較之上年更

貴又江蘇所屬州縣今年採買穀石秋後更多有
買補糶三之穀有買補撥協賑濟之穀有採買積
貯或糶或存之穀事關隣省民食倉貯俱當聽其
買運然目今北南米價每石一兩上下日漸昂貴
若至明年青黃不接之時誠恐有增無減楚米長
價則江浙米糧愈貴臣既有所見聞不得不從長
籌畫請將楚省收捐貢監事例再停一年俟甲寅
年秋收豐稔再行收捐則楚省與隣省之民均免

食貴之虞抑臣更有請者查楚省北南與江浙二

省均有買補倉穀之案一時竝買價值愈增自應酌量緩急次第買補今陸續接准江浙督撫咨文該二省州縣已令屬役齎價來楚採買穀石者應先儘江浙買回以實倉貯其楚省北南各倉積貯豐裕所有應補米穀尚可分年採買如湖南知會運濟軍糧事碾米運黔案內應買補穀二萬石又公籲據情奏請事案內商交存剩未買穀價銀三

千九百八十七兩零以上二案為數無多應行買
補又湖北欽奉

上諭事動帑糴買新穀案內存剩未買穀價銀一萬一
千三百三十四兩零現今飭令買補餘俱緩俟明
年秋成前後照數買補還倉如此則米穀流通而
民食積儲均有攸賴矣是否有當伏祈

皇上睿鑒訓示遵行謹

奏

所見是如此酌量緩急辦理甚屬妥協仍咨明該部存
察

同日又

奏為請補要地同知以資督理堤塍事竊照荊州府
同知張桓曲法婪贓經撫臣德齡疏叅在案所遺
同知員缺兼管水利各屬堤塍關係

國賦民生最為緊要務須勤慎練達之員庶於地方
有裨倘部選人員於修堤利弊未能諳曉貽誤甚

大臣於屬員中詳加揀選有潛江縣知縣張延慶
年力強壯辦事勤敏在任十年熟悉修築堤壩之
法以之補授水利同知則府屬堤務固其才所優
為但該令係革職留任之員兼有降罰案件與例
不妨聲明題請不符未便會同撫臣用明本具題今荊州府同知
事務現委張延慶護理倘蒙

皇上破格擢用將張延慶以荊州同知試用俟三年無
過准其實授則該員自當倍加奮勉向前以圖報

效也再查原任湖北布政使今署理湖南巡撫印
務鍾保奏請丈量沔陽州田畝摺內恐任用不得
其人請將張延慶調補沔陽知州奉

諭旨言之督撫若意見相同具疏題請欽此臣思丈量
輿情固須體察然要當審度應行與否據理而辦豈宜
一徇輿情馴至因循貽誤但不得過於苛求亦毋使任
意恣止未定現今荆州府同知要缺需人臣為隄壅重
務起見謹具摺臣

奏請伏祈

皇上睿鑒施行謹

奏

覽

雍正十一年十二月十九日湖廣總督臣邁柱謹

奏竊臣前奏容美司田旻如假撫恤荒民不即進京

及土人投出五百餘名口一摺奉

硃批觀卿辦理容美事務似覺過於輕視百凡有備無患稍涉輕忽則恐有疎畧之失前次諭旨甚明其遵

諭慎密圖維靜以俟之可也欽此先於雍正十一年

十二月初三初五日准大學士鄂爾泰寄信兩次
奉

上諭覽總兵冶大雄所奏容美土司田旻如情形其蓄
意不法業已顯露令臣先據所報檄問田旻如看其
如何回覆一面就近酌調官兵詳籌妥備務俟田旻
如有不肯來京不敢來京之語然後聲明其罪可以
大定復令臣臨進兵時務須嚴飭將弁無論幾路俱

密約定期先將各要隘占踞俾不得竄逸等因欽此
欽遵仰見

皇上睿謨深遠措辦咸宜臣敢不悉心籌畫先事整備
自取踈忽之咎臣前准部咨奉

旨著田旻如來京隨即委員伴送旻如赴部引

見一面移會北南兩撫暨署提督夔陵鎮鎮寧鎮并北
南界連容美之協營堵截要隘各加防範又密札
荊州道府州縣廣為差探看旻如有無動靜去後

嗣因土人紛紛投出經彝陵總兵治大雄稟報委

後營遊擊張廷蘭赴要路鄆陽關巡防又委右營

遊擊王鎮維赴要路漁洋關巡防至於湖南如何

進攻堵截之處已據鎮算總兵楊凱詳悉稟覆又

據道府州縣差探容美司中毫無舉動田旻如先

以撫恤荒民托故延挨經臣行文飭催起程又以

奏請寬限之摺未回且有辯訴之處應俟摺回起

行臣查田旻如先稱十月初四日拜摺已隔兩月

有餘諒當回歸仍委夔陵鎮守備韓岳伴送并飭
催作速起程未據旻如回覆現在復又嚴檄查催
茲於十二月十四日據夔陵鎮咨呈據遊擊王鎮
維稟報有土民唐均佐等稟投呈詞戶口單又有
五峰石梁司長官張彤硃帶同土民到漁洋關汛
繳康字六千九百三號印信一顆令箭一枝并烟
戶冊願入民籍十六日又據歸州知州申稱有續
投出土人三十六名口稱土衆約齊要公掣司官

送省各等因除先經投出土人俱捐給口糧安插
外總之容美土民被旻如凌虐已久現今土衆約
會欲拏旻如到省益見衆怨親離旻如孤立無助
且惟恐起程之後土衆利其所有早離司署攜眷
至太平寨居住此時旻如畏懼自顧不暇臣欽遵
諭旨靜以俟之看其回文到來如有不肯進京不敢進
京之語只得酌遣官兵於北南各關隘駐劄先發
告示進司曉諭土民并令土舍解出旻如餘俱安

堵如故倘有不遵則兵進之日未免擾累如此傳
示則旻如必為土衆擒拏解出可以不煩一兵不
折一矢又名正言順比臣就容美之情形相機辦
理俾無驚擾實非輕忽從事恐塵

聖懷理合備悉奏

聞伏祈

睿鑒謹

奏

覽奏容美近日情形已悉總之凡事寧過於慎重不可
視為輕易一切處能料及於意外何患諸務不克辦集
也

同日又

奏為恭報瑞雪情形仰慰

聖懷事竊照北南兩湖十一月初十十一二三等日遠
近遍處得雪積高一二尺不等其民間布種二麥
較之往年更廣現吐青芽目下米穀雖有江浙採

買搬運市價不甚昂貴地方寧謐四民安居樂業
共享

盛世昇平之福理合奏

聞伏祈

皇上睿鑒謹

奏

據奏全楚冬雪霑足麥吐青芽欣悅覽之都城內外於
元旦立春時荷蒙

上蒼普賜盈尺之雪可謂南北同慶共沐浩蕩

天澤也

雍正十一年十二月二十四日湖廣總督臣邁柱

謹

奏為恭繳

御批奏摺事竊臣前奏署永州鎮總兵王維一不能勝
任一摺奉有

硃批仰見

聖明遠照務期人地相宜之至意伏思總兵官膺封疆
重任首重技勇超軼尤須潔己明敏臣前將王惟
一題署永州總兵印務實屬誤用蒙

皇上不加譴責仍

命臣斟酌題署謹於北南副將中詳加揀選全材不易
多得如湖北黃州協副將朱文華熟悉內地營伍
而前在永順協辦理苗疆不甚妥協鄖陽協副將
陳明道才堪辦事而為人瑣屑湖南辰州協副將

母椿齡人本勇健而性情躁急操守亦屬平常寶慶協副將江之湛忽得痰迷之症現今調治九谿協副將李椅到任未久尚欠歷練永順協副將王進昌智勇出眾堪寄重任因與知府袁承寵協辦邊疆事務漸有頭緒此時不便另用其餘俱循分供職惟衡州協副將崔起潛弓馬人材俱屬可觀又操守謹飭營務練達是以仍將崔起潛

題請署理永州總兵印務在王惟一雖不勝總兵之

任但前在長沙協副將任內營伍整飭其衡州協副將員缺堪以王惟一署理再觀後效以上二員經臣另疏具

題伏候

睿鑒施行所有原摺理合恭繳謹

奏

永州總兵印務姑令崔起潛暫為署理朕若得有勝任之員仍另用來

容美之奏交九卿議覆候旨遵行向聞土司地界最易
藏垢納污今容美境內有無隱匿逋逃亟當詳查密訪
勿致疎漏其加意毋忽



硃批諭旨卷二百十三之五



總校官庶吉士臣侍朝

校對官編修臣莫瞻菴

膳錄監生臣張槎